

الفصل السابع

"عريس حنين"

"حنين تحكي لوالدها عن الدكتور "عمر فؤاد"، وأنه معجب بها، وفي نفس التوقيت تتقدم "زينات" -أخت المرحوم "حاتم"؛ لكي تخطب "حنين" لابنها "علاء".

"حنين" عائدة من الجامعة، ووجهها ترتسم عليه علامات
السعادة والبهجة؛ لأن الدكتور "عمر فؤاد" صرح لها
بإعجابه.

* إيه يا حبيبي دا؟

إيه يا قمر العيلة وأول فرحتها دا؟

بدر منور، يا حبيبي احكي لي، إيه الفرحة اللي أنا شايفاها
هاتنط من عينيك دي؟ طمني يا حبيبي وفرحيني، فرحي
قلبي أكثر ما هو فرحان.

_ يا ترى قلب ماما حبيبي وحياتي فرحان ليه؟ ومن إيه؟

* يا واعية انت، أنا اللي بسألك يا دكتورة، وانت اللي عليك
تجاوبي، مش همّا بيعملوا معاكم كدا برضه في الجامعة؟
بيسألوكم وانتوا بتجاوبوا؟ ولّا مش هاتجاوبي؟! وبعدين يبقى
فيه كحك؟

_ لأ يا ماما، دا هايبقى فيه كمان بتي فور وشربات وحاجات
ومحتاجات، وزينات بس مش زينات عمتي، زينات تانية
خالص، زينات كدا بتنور بالكهربا.

* فكرتيني بعمتك زينات يا حنين، دي مستقوية القلب، منها
للّه هي وعمّاتك كلهم.

_ مالهم يا ماما عماتي؟

ومالها عمتي زينات؟

"شكرات تحاول أن تتظاهر باللامبالاة؛ لكي لا تؤثر على نفسيّة حنين بنتها":

* خلينا فيك انتِ يا حبيبتي، والفرحة اللي انتِ فيها، كملي لي يلا..

"حنين وهي في غاية الخجل":

_ الله بقى يا ست ماما، هاتكسفيني! بعدين بقى لما يقول لي، ويصرح لي إنه عايز يجي يقابل حضرتك، علشان يطلب إيدي.

"زينات" - الشقيقة الكبرى لـ "حاتم" زوج "شكرات" -، لديها ابن اسمه "علاء"، شاب عمره ستة وعشرون عامًا، وتكوينه البناني ضخم، استغل هذا التكوين في الحصول على فرصة عمل أثناء دراسته قبل سفره للخارج، مع الرقصات في الملاهي الليلية، لحمايتهم والدفع عنهم من المخمورين والباطجية، وهناك تعلم أساليب كثيرة، ولغة أخرى؛ لغة

جديدة عن لغة المجتمع الذي تربي وعاش فيه مع الأهل والأصدقاء، لغة غير مألوفة للتعامل بها مع أناس طبيعيين.

اليوم رجع "علاء" من إيطاليا لزيارة أسرته، وقد سافر هذه الدولة بعدما تخرج من المعهد، وحصل على شهادة فوق متوسطة؛ كونه كان مدللًا، فهو الولد الوحيد على ثلاث بنات، وهو أصغرهم، فأمه جعلته فوق رؤوس الجميع "الإخوة والأهل"، والده وافق على سفره إلى الخارج لكي يكون نفسه، لأن هناك في هذه الدولة الأوروبية يوجد خاله "ياسر" الذي ترك مصر منذ أكثر من خمسة وعشرين عامًا، ولأنه كان ولدًا مدللًا لم يضع العمل الجاد والشريف غايته، ولكنه اعتمد اعتمادًا كليًا على خاله، إلى أن غضب خاله من أسلوبه الغير مسئول، ومن كثرة نصائحه له التي لم تأتِ بثمارها، لأنه بدأ يتصاحب على بعض أشخاص هناك، اتضح له فيما بعد، أن هؤلاء الأفراد يعملون ضمن عصابات المافيا الدولية، ومعروف عنهم أن لديهم نشاطات في كل شيء، وفي كل مكان في العالم، فمن خلال هؤلاء الأشخاص تعرّف على شخصيات كبيرة في هذا التنظيم العصابي، "علاء" من

خلال العمل مع هؤلاء الأشخاص اكتسب ثراءً فاحشاً، وأصبح في فترة قصيرة جداً يمتلك ملايين الدولارات؛ لأنه كان مميزاً في كل شيء، في قوته ودهاءه، علاوة على أنه كان قناصاً ماهراً، فاستطاع أن يشتري هناك مطاعم كثيرة في مدينة روما رغم صغر سنه.

"بعد تناول العشاء، أمه تقول له:

* واد يا لوئه، عايزين بقا نفرحوا بيك، انت خلاص كدا مش ناقصك أي حاجة، عندك عمارتين هنا، واحدة مسكّنها في أحسن حطة في اسكندرية، والثانية احنا قاعدين فيها أهو، وكل واحدة من أخواتك البنات قاعدة في دور كله لوحدها، وكمان الفيلا الجديدة اللي هاتجوز فيها فاضل عليها حاجات بسيطة وتتشطب، ما فاضلش غير العروسة يا واد يالوئه، عايزين نشوفوا لك بقى حطة عيّل يتربى في عز أبوه.

_ إيه يا ماما؟ انتِ مستعجلة على إيه؟! لسه بدري، بعدين بعدين، لما نتمتع بحياتي الأول ونشبع من الدنيا، انتِ عارفة الجواز تقييد للحرية، وأنا ما نحبش حاجة تكتفني، ولا إيه رأيك انتِ يا حاج؟

الحاج سارية:

~ يا ابني الجواز نص الدين، الجواز سترة برضه.

_ يا بابا أنا بحب أكون حر دائماً زي العصفور الطليق.

* لما تعرف أنا حاطاك عيني على مين يا واد هاتوافق على طول، دي مال وجمال وأدب وعلم كمان، دي حلاوتها يا واد مالهاش حل، دي أحلى من الأجانب اللي بتشوفهم هناك في إيطاليا.

_ مين هي دي يا ماما؟

* أنت عارف حنين بنت خالك حاتم -الله يرحمه-؟ حنين اللي كنا كلنا بنقولها يا حوثة، انت مش فاكرها؟

_ أيوه يا ماما فاكرها، حد ينسى بنت خاله؟ بس أنا فعلاً بقى لي كتير ماشوفتهاش، يمكن من وأنا في ثانوي، من ساعة خالي ما مات -الله يرحمه-، ويمكن من قبل ما أسافر كمان ماشوفتهاش.

* دي هاتتخرج خلاص أهي وهاتبقى دكتورة قد الدنيا.

_ خلاص أشوفها الأول، يمكن ما نرتاحوش لبعض.

* ما ترتاحش إيه؟! باقول لك دي مال وجمال، أنا بكرة الصبح هاخذ أخواتك البنات ونروح لأمها نفاتحوها، انت أحق بيها من أي حد تاني.

تقوم وترفع سماعة الهاتف الأرضي، وتبلغ الخبر لكل أخت من أخواتها البنات؛ ليذهبن معها ومع بناتها، ويفاتحن "شكرات" في الموضوع، ولكن كل واحدة منهن كانت تضرر الضيق والضجر من هذا الأمر؛ لأنهن كنّ يتعشمن أن يخطب علاء إحدى بناتهن، ولذلك اعتذرن جميعًا بحجة أنهن منشغلات بامتحانات أولادهن، ولن يمكنهن الذهاب معها، واقترحن عليها تأجيل ذلك الأمر حتى انتهاء الامتحانات، ولكن "زينات" ردت عليهن بأن ابنها "علاء" سيسافر بعد أسبوعين، وتريد التعجيل بالأمر؛ لكي يتسنى للعروسين أن يألفا ويتفقا، رغم أنها بنت خاله، إلا أنهما لم يلتقيا كثيرًا، ولا توجد بينهما لغة حوار، ثم أنهت معهن المكالمة الهاتفية وهي غاضبة منهن جدًا....

* مهما كانت الظروف، كان المفروض يكونوا معايًا في موضوع مهم زي دا.

في صباح اليوم التالي، تتوجه "زينات" هي وبناتها لزيارة "شكرات".

"شكرات" تقف في البلكون؛ لكي تطمئن على "حنين"، وهي خارجة بالسيارة من جراج العمارة متجهة إلى الجامعة، في نفس التوقيت الذي خرجت فيه "حنين" بالسيارة من الجراج وتوجهت إلى الجامعة، بعدها بثوانٍ جاءت سيارة أجرة ووقفت أمام العمارة، فنزلت منها "زينات" وبناتها، وفي هذه اللحظة "شكرات" كانت تدعو لبنتها بالستر والسلامة، وأن يسعد الله قلبها، ويسعدها مع ابن الحلال الذي اختاره قلبها، وأن يحافظ عليها ويصونها ويضعها في عينيه.

"زينات" تدخل هي وبناتها العمارة متجهات لشقة "شكرات"، وإحدى بناتها تضغط على الجرس، تفتح "شروق" -ابنة خالها- الباب، تستقبلهن "شكرات" بتحفظ شديد؛ لأنه دائماً حينما تأتي "زينات" لزيارتهم يكون يوماً مليئاً بالمشاحنات، كما أنها ليس بالعادة أن تأتي "زينات" هي وبناتها للزيارة في الصباح الباكر هكذا، ظلت "شكرات" تفكر وتخمن سبب الزيارة، وبينها وبين نفسها:

- أنا كنت لسا هاتصل بماضي علشان أفرحه، وكمان أطمّن عليه، وأسأله ليه ما اتصلش بيّا لحد دلوقتي كل دا؟
"هذا ما كان يدور في خلدّها أثناء استقبالها لهن".

- يا مرحب يا جماعة، نورتونا، إيه الهنا دا كله؟

* دا نورك يا حبيبتى، عاملة إيه؟ ما بتسألش علينا يعني ولا حتى بتيجوا؟ قلنا احنا نيجوا ونطمّنوا عليكِ وعلى ولاد أخويا حبيبي الغالي -الله يرحمه-، دا أنا اللي مربّياه، أنا أخته الكبيرة يا حبيبتى، ما انتِ عارفة كدا، ربنا يطول عمرك وتعيشي وتتهني انتِ وولادك.

- أبدأ، انتِ عارفة مشاغل الأولاد، وخصوصًا الدكتورة حنين الأيام دي خلاص على وشّ امتحانات البكالوريس، غير بقا باقي الأولاد كل واحد له همه وظروفه يا حبيبتى، وكمان الحاجة عليّة لازم أقوم بكل طلباتها على أكمل وجه، دي بركتنا كلنا، ولا إيه يا أم علاء؟! أخوكِ -الله يرحمه- موصّيني عليها قوي قوي إني أحطّها في عيني كدا.

* صدقيني يا حبيبتى، دا لولا بس المرحوم حاتم كان موصينا كلنا إن أمنا ماتسيبش المكان هنا مهما كانت الظروف، كنا

أخذناها عندنا بس دي وصية الحبيب الغالي، وانت عارفة بقا
الوصية.

- الغالي؟!!

أااااه عارفة يا أم علاء، دي ياما دعت له ربنا يرحمه ويجعل
أراضيه الجنة يارب.

* يقعد لكم يارب في صحتكم، وفي ميزان حسناتكم، احنا دايمًا
بندعوا له بالرحمة وبندعوا ربنا يفرحك بأولادك وبالديكتورة
يارب، ربنا يرزقها بابن الحلال اللي يعرف قيمتها، ويتاقلها
بالألماظ.

- لسا بدري يا أم علاء، مش لما تخلص الجامعة الأول؟
وتشوف هاتعمل إيه بعد كدا؟

* وفيها إيه لما كله يبجي مع بعضه؟

- هي مش بتفكر في الارتباط دلوقتي خالص.

* بس لما تعرف مين اللي حاطط عينيه عليها، هاتطير من
السعادة.

- مين دا اللي حنين هاتطير من السعادة لما تعرف إنه حاطط
عينه عليها يا ترى؟

* علاء ابني ما شاء الله عليه، قيمة وسيما وطول وعرض،
وكمان جاهز من مجاميعه، وبيشطب فيلته ومش ناقصه غير
العروسة، امبارح لما رجع من إيطاليا اتكلمت معاه، أنا وباباه
وقلنا له عايزين نفرحوا بيك بقى ونشوفوا لك حتة عيل تفرح
بيه انت ومراتك.

- لكن حنين مش بتفكر في الارتباط دلوقتي، لسه وراها
الماجستير والدكتوراه، زي ما المرحوم كان عايز يشوفها
دكتورة كبيرة قد الدنيا.

* وهو الارتباط هايعطها عن الدراسة؟ دا ممكن علاء ياخذها
معاه وتدرس الدكتوراه دي في أوروبا.

ابنة "زينات" الكبرى تقول لـ "شكرات":

~ والله يا طنط احنا بنحبوا حنين بنت خالو قوي؛ لأنها زي
النسمة كدا، وماحدش بيسمع لها صوت، وعلاء أخويا مش
هايخلي نفسها في حاجة خالص يا طنط.

يا حبيبتي أنا هافاتها في الموضوع والقرار قرارها، هي
هاتعرف مستقبلها كويس الحمد لله؛ لأنها عاقلة وبتعرف
توزن الأمور.

زينات:

* طيب فكروا على مهلكم، احنا مش مستعجلين، يلا يا بنات.
"وعلى ملامحها يبدو الغضب بسبب طريقة رد "شكرات"
عليها في الكلام"

شكرات:

- طيب ليه مستعجلين؟ ما انتم قاعدين معانا يا جماعة شوية.
"زينات" تغادر منزل "شكرات"، وهي غير راضية تمامًا عن
هذه الزيارة؛ لأنها لم تجد اللفتة والحفاوة التي كانت
تتوقعها، على أساس أن "علاء" ابنها عريس مناسب لأي
بنت؛ لأنه لديه كافة الإمكانيات، وهذا من وجهة نظر والدته.
والدة الدكتور "عمر" -زوجة "فؤاد" صديق "ماضي" - تقول
لابنها وهو متوجه للجامعة:

_ حبيبي مش هايفطر؟

بقي لك كام يوم كدا! ملاحظة عليك إنك مش عايز تفرط،
وبتبقى دايماً مستعجل، مش عوايدك يا حبيبي،
قول لي لو فيه حاجة شاغلاك يا دكتور، فيه حاجة في
الجامعة؟

احكي لي يا حبيبي وقول لي، أنا ماما حبيبتي.
* بصراحة يا ماما فيه، بس الحاجة اللي شاغلاني دي حاجة
تفرّح يا حبيبتي، ماتقلقيش.

_ طمّني يا حبيبي قوام، فرّح قلبي يا عمر.
* فيه بنت يا ماما اسمها حنين، أخلاق إيه! ما تتخيليش يا
ماما جمال إيه!

إنسانة متفوّقة في دراستها وفي كل السنين.
_ يااه.. دا انت عارف عنها كل حاجة يا حبيبي!
* طبعًا يا ست الكل، سمعت وعرفت، وكمان ايه.. بتجيب
امتياز على طول، مش بعيد تتعيين قريب قوي معيدة في
الجامعة، وتكون زميلة.

_ ها؟ من امتي يا حبيبي مشغول بيها؟
* من السنة دي يا ماما، لفتت انتباهي بشكل غريب!
خلّتي حطّيت عيني عليها، بس من بعيد لبعيد؛ لأنني ماكنتش
بدخل لهم قبل كدا، لكن السنة دي أنا بدرّس للطلبة في القسم
اللي هي فيه؛ علشان هي تخصص جراحة عامة، وبقيت
أشوفها كثير.

_ وصارحتها يا حبيبي بحقيقة شعورك؟

* أيوة يا ماما، وقعدنا في مكان عام قريب من الجامعة،
واتكلمنا وعرفت حاجات كثيرة قوي عن حياتها.

_ يارب يا حبيبي تكون من نصيبك، أنا نفسي تتجوز واحدة
تكون بتحبها، زي أنا كدا وباباك اتجوزنا عن حب، وكنت
زميلة له في الكلية، ربنا يوفقك ويسعد قلبك يا عمر يارب.

* أنا عايزك بقى يا حبيبتي كدا، تمهّدي الموضوع دا عند
بابا، أول ما يبجي من القاهرة تكلميه، هو خلاص جاي بكرة
ولّا بعده إن شاء الله.

_ هو كلمني وقال لي إنه خلص الشغل الكثير اللي كان عنده
في الشركة.

* ربنا يخليك لينا يا ماما ويخّلّي لينا بابا يارب.

_ عقبال أختك لبنى بقى هي كمان، لما تتخرج كدا من الإعلام
يا حبيبي، ونفرحوا بيكم وبأولادكم.

ذهب "ماضي" إلى المحل وجلس على مكتبه، كان مترددًا،
هل يتصل بـ "شكرات" أم لا؟ كان يساوره شعور غريب ولا

يعرف ماهيته، كان قلبه غير مطمئن؛ فأمسك بالهاتف واتصل
برقم "شكرات":

_ ألو..._

* مش ممكن، لا لا مش ممكن!

_ هو إيه بس اللي مش ممكن؟

* علشان أنا لسه كنت هاجيب الموبايل وأطلبك.

_ ياه! احنا الاتنين فكرنا نطلب بعض في نفس الوقت؟
غريبة فعلاً!

* ليه ماتقولش القلوب عند بعضها؟

_ كنتِ هاتكلميني في إيه؟

* لا قول لي انت الأول، كنت هاتطلبني، قصدي كنت
هاتكلمني في إيه؟

" كانت تكلم "ماضي"، وهي تشعر أن سنوات الحب القديمة
قد عادت من جديد"

_ يعني بلاش أطمئن عليك؟! قصدي على حنين؟

* امممممم على "حنين" بس يا ماضي؟

_ لأ طبعًا، وأم حنين.

* باقول لك إيه! مش هاينفع نتكلم في التليفون، انت لازم تقابلني ضروري.

_ خير يا شكرات؟ قولي لي قلقتيني.

* ليه هو انت ماكنتش ناوي تيجي تشوف حنين مع الجماعة؟

هما جايين يوم الجمعة اللي جاية دي على طول.

_ ينفع نتقابل بكرة في أي مكان عندك في الإسكندرية؟

محتاج أتكلم معاكي في موضوع حنين.

* وأنا نفس الحكاية فعلاً، أنا كنت هاطلبك يا ماضي علشان

فيه موضوع خاص برضه بحنين بنتنا، يا أبو العروسة.

_ عروسة؟!

* لما نتقابل بكرة إن شاء الله هاتعرف كل حاجة، قابلني

بكرة الساعة خمسة بعد العصر، قبل ما توصل إسكندرية رنّ

عليّ أقول لك المكان فين بالظبط اللي هانقعد نتكلم فيه.

_ تمام كدا، مع السلامة، خلى بالك من نفسك.

* وانت كمان خلي بالك من نفسك، سوق على مهلك.

_ لا إله إلا الله.

* محمد رسول الله.

"شكرات" تنهي المكالمة مع "ماضي"، وتسرح، وتفتكر في
الحوار الذي دار بينها

وبين "حنين" عندما كانت عائدة من الجامعة، وهي تقول
لها:

_ فرّحيني أكثر ما أنا فرحانة.

ساعتها كانت تتمنى "شكرات" أن تقول لها:

* أنا سمّيتك حنين؛ لأنك انتِ فعلاً حنين الماضي، والماضي
اهو رجع، والحنين خلاص صحي.